

# Platt partu:

Rundbreef 2022-02

## Verännern in't niege Johr

Se strakelt em de Backen zoort:  
„Raseer em af, den Zackenboort!“

Moinmoin, leve plattdüütsche Maten un Frünnen!

Un wedder hett en nieges Johr mit en vullen Plattpartu-Maand anfangen -- un wat för en Johr? Dat is dat twintigste Johr vun Plattpartu! Aprilmaand 2002 is Plattpartu online gahn, un eentlich much ik na 20 Johr un teihndusende Bidrääg mal beten kötter pedden; man wenn uns Maten uns so veel gode Saken schickt, denn warr ik de ok wieder rutbringen. Also man to! :-)

Wirklich, düssen Winter woorn wi mit fiene Bidrääg reinweg bombardeert. Knapp dat de Silvesterklocken verklungen sünd un de Wildvagels sik för minner Böllerie bedankt hebbt, hebbt wi uns niege Reeg op dat Künst-Flack start, 'neem Thomas Seemann Kultur- un Naturschönheiten ut sien oostfreesche Heimat porträteert -- as Optakt den Roden Sand. Noch is Wiehnachtstied; ut Rudi Witzkes Nalaat stammt de schöne Artikel över dat jüüdsche Niejohrsfest vun de Bööm. Mit den Dreekönigsdag geiht de Wiehnachtstied langsam to Enn; un weer een vun jüm wirklich swatt?

Op dat Flack Wat in de Welt vörgeiht kommentiert Behrend Böckmann genüsslich lütte un grote Verdrehtheiten vun uns Welt, de ja wirklich en Knall hett. Wenn em dat heel un deel to unklook warrt, riemelt he sogar. Narrsch is ok dat Parlament, dat staats en Poeten beter en Hoffnarrn anstelln schull. Un faszineert sünd wi mal wedder vun dat niege Ruumteleskop Jimmy Webb, dat meddewiel an sienen Lagrange-Punkt L2 ankamen is. Dor warrt wi vun Sommer af an noch veel Schööns vun hören un hier op Platt dokumenteern, hööpt wi!

Nervlich an'n Lagrange-Punkt ankamen is ok Gertrud Everding, de bloots noch üm en Enn vun Corona beden deit. So geiht dat sachs mennig Lü; de annern kööpt Plüschviren. Avers dat gifft ok gratis gode Medekamenten, un sülvst bi Corona blievt dusend Mööglichkeiten, dat Leven to geneten. Kannst Haie orr Udels argern, dien Heimat erforschen orr dien Heim mit Planten verschönern. Vun Arbeit raadt wi avers af.

To'n Sluss vun unsen Rundbreef doot wi, wat anner Lü as Instieg bruukt: Wi snackt vun't Weder. Dormit wiest wi, dat wi so meisterhaftig Smalltalk köönt, dat wi keen so'n Standard-Hülpsmiddel nödig hebbt. Also dat Weder weer ja nu ünner all Kritik. Den ganzen Winter nix as Drecksweder!! Op dat Kinnerflack vertelt de Märken ja tominnst noch vun Frost un les, un de Waterdrüppen hebbt sünneliche Drööm dorvun... Man in echt is dat nix as gries, un de Storm puust di dat Mark ut de Knaken!

So, dat weer de Wederbericht, un dormit sluut de Plattpartu-Narichten. Ik hööp, neegsten Maand hebbt wi wedder Godes to vertelln -- villicht sogar vun't Weder! ;-)

Dat gah Se good bet denn!

---

Nu de Linkliste. Op de Links bruukt Se bloots klicken, dat Se henkaamt.

### **Plattdüütsch Kunst:**

Oostfreesland-Klenner Januar: Lüchttoorn Rode Sand. Vun Thomas Seemann un Marlou Lessing (2.1.)

Notizen ut'n Braakmaand. Fotos un Verse vun Marlou Lessing (2.1.)

Silvesterklocken. E. v. Adlersfeld-Ballestrem, översett vun Ludgerd Lüske (1.1.)

### **De Welt un Gott:**

Dusend Mööglichkeiten. Vun Katja Renfert (30.1.)

Wunnerwarken in Mäkelborg: Beseuk an Havel un Elde. Vun Hans-J. Grebin (25.1.)

De 7 besten Medekamenten. Vun Katja Renfert (24.1.)

Rentners Vergneugen. Vun Heinz Tiekötter (24.1.)

Wo is dei Cycas? Vun Heidi Rumler (22.1.)

Seemannsgarn: Haifische argern. Vun Günter Sohnemann (15.1.)

Woans Moses tau sien Hüörn keem. Vun Behrend Böckmann (11.1.)  
Arbeit? Nee danke! Vun Fidi Ehlbeck (5.1.)  
Dei schwatte König in'n Stall tau Bethlehem. Vun Behrend Böckmann  
(5.1.)  
Niejohr vun de Bööm. Vun Rudi Witzke (2.1.)

In't lütte Gebeedbauk:

En Corona-Beden. Vun Gertrud Everding (20.1.)

### **Natuur un Wetenschap:**

Toxisch Planten: Aadlerfarn, Jakobs-Krüüzkruut. Vun Anke Nissen  
(30.1.)  
Stormbiller. Vun Behrend Böckmann (30.1.)  
Nasa diskuteiert -- Webb kummp bi L2 an. Vun Ludgerd Lüske (22.1.)  
James Webb kiekt in't All. Vun Marlou Lessing (16.1.)

In't aktuelle Natuur-Notizbook:

Silvester? Klei mi! Vun Katja Renfert, Marlou Lessing (2.1.)

### **Wat in de Welt vörgeiht:**

Dei Loopbüx ihren. Tau'n Joggingbüxendag vun Behrend Böckmann  
(21.1.)  
Dat Plüschvirus. Vun Behrend Böckmann (19.1.)  
Push Pop -- dei Blasenknaller. Vun Behrend Böckmann (11.1.)  
Dat Hotel "Schwerelos". Vun Behrend Böckmann (2.1.)  
Lockdaun, Wellenbräker, Notbremse. Vun Behrend Böckmann (1.1.)

In Marlou Lessings plattdüütsch Notizbook:

Ganze Johrhunnerte ahn Paapst (25.1.)  
Wieldat wi Fruuns sünd (22.1.)  
Parlamentsnarren (17.1.)

**För Kinner:**

Modder Sünn ehr Kinner: Wåterdrüppens Drööm in'n Winter. Märken vun Sophie Reinheimer, överdragen vun Klaus-Dieter Tüxen (19.1.)

Modder Sünn ehr Kinner: Kole Noordwind — blanket les. Märken vun Sophie Reinheimer, överdragen vun Klaus-Dieter Tüxen (5.1.)

---

Hartlich grööt

Marlou Lessing un dat lütte Plattpartu-Team